

À C'FESSE

Li qu'aveûve dimandé d'aler dins one parwèsse, po s' prumêre place, l'èvêque l'aveûve èvôyi al grande sicole. Il î sèrè gârde*. Bin rade, il a socené avou l' curé do viladje d'a costé : on brâve ome, qu'aveûve dèdja d' l'âdje. Insi, po s' pus grand plaîji, i lî d'mandeûve co voltî on p'tit côp d' mwin. Ci djoû la, i l'aveûve prîyi come cofèsseû po l' fièsse di Noyé. « Ostant ènn' awè on djon.ne », pinseûve-t-i. « Insi, lès djins si rachoneront pus voltî addé li, qu'èmon on vî come mi, vèyanmint qui dj' lès coneu dispû dès-ans èt dès razans. »

- Vos-ènn'auroz sûr one vintin.ne', aveûve-t-i promètu.

Ayi vos ! Wêre di parwèssyins qu'on-z-a vèyu ètur quate èt chîj eûres. Mins ci n'èst rin ! L'eûre d'après, gn-aveûve one quèwêye. A crwêre qui dins l' payîs véla gn-aveûve qui dès cinsîs qui n' vinin.n' à c'fèsse qu'après awè tot fait leû bèsogne.

Arive one comére – dji d'vreûve dire, one pîce di comére – què lî vint causer di totes sès misères... Quausu on gros quârt d'eûre qu'èle a fait pèstèler lès cias qui ratindin.n'. A pus qui dins s' bèrdèladje, i-gn-aveûve qui fwârt wêre di gros pètchis, savoz !

Nosse djon.ne curé lî done si pârdon èt i l' rèvôye dîre on tchapelèt tot ètîr. I pinse è li minme :

'Vous' wadjî qu'èlle èst capâbe d'aler fé pèter s' linwe èt anoncî qui dji n' so nin co la si deur avou l' pènitince !

I r'ssère li plantche. I lî chone qui l' comére n'è va nin. Èlle a rovyî one saqwè, dandjureû ! Tot en r' douviant l' bawète, i l'ètind :

- Nom di dju ! Nom di dju ! Comint èst ç' qui dji m' va rawè di d'ci, mi ?

Oblidjî nosse brâve ome di moussî foû po lî d'ner on côp d' mwin... Portant i s' rastint po n' nin rîre, peû qu'èle sondje qu'i s' fout d' lèye.

One boune lèçon, don, po-z-aprinde si novia mèsti !

Bernard Van Vynckt

* Gârde : surveillant